

A CHHUNG A THU AWM TE

<i>Thuhmahruai</i>	(1)
<i>Hriattur pawimawhte</i>	(2)
<i>Inkhawm dan tur kalphung</i>	(3)
<i>Ni pawimawh zawlawlna</i>	(4)

THUHMAHRUAI

BCM Ni Pawimawh Programme hi tun hma chuan a tlachawpin Bialah inthawn thin a ni a. Lehkha hmuh loh leh tlai palhte a awm fo thin avangin Assembly rorelna chuan, Kohhran ten a hun taka kan hmuha, kan lo inbuatsaih lawk theih nan a Bu a siam tha tiin, kum 2012 atang khan kum tinin siam a lo ni ta a. Kum 2021 chhung atana kan Ni Pawimawh Programme bu buatsaih pawh hi Kohhran tana hlawk leh tangkai a nih ngei ka beisei.

Kuminah hian a kalphung tlemin kan han thlak leh deuh va. Department lam atanga thuchah chhiar chhuah tur awmte kan dah bak chu Ni pawimawhte History tlangpui leh tangkai thei tur zeh tel hlek hlek a ni a, Kohhran leh hun changtute tan puitu tha tak a nih ka beisei. Inkhawm kalphung (order of service) tur duan sa pawh dah nawn fo tawh lovin, phek (3) naah chauh hian dah a ni ta a. Kan Pathian biak inkhawmnaa thawhlawm/thilpek lakkhawm laia hla sak tur thlan lawk sa a awm zeuh tih bak chu, hun changtu ten zalen zawka an hman theihna turin, Bible chhiar tur nen hian duhzawng thlan belh theih tura dah a ni. Tin, kan Ni Pawimawh atana thupui kan dah lawk thin chu engemaw zat chhawk niin dah a ni ta lo baw a. Hengte hi Tualchhung Kohhran Committee duh dan anga kalpui tur a ni ang.

Phek (2) na ami '*Hriattur pawimawhte*' tih leh phek (3) na ami '*Inkhawm dan tur kalphung*' (order of service) te hi uluk taka bih leh zirin, zawm leh tihhlawhtlin ngei tum ila. Ni pawimawh thenkhat chu Kohhran inkhawm hun pangngaia a inherchhuah loh avangin hman remchang lo riau pawh a awm thei a; hun hmang theite erawh chuan inkhawm kalphung duan sa anga hman tum hram ni se. Tin, Ni pawimawh thenkhat Pathianni a tla a awm baw a. Chungte chu Kohhran Committee leh a Concern Committee ten inhrethiam tawna ruahmanna siam ho te pawh a tha ang e.

Rev. Lalremsiama Ralte
 Director
 Worship and Music Department

HRIAT TUR PAWIMAWHTE

- 1) Inkhawm kalphung tur duan lawkna (Order of Service) hi dah nawn fo ngai lo-in Phek (3) na-ah hian dah a ni a. Hemi zul zui hian Pathian biak inkhawm kan neihte kalpui tum theuh ni se.
- 2) Ram pumah inkhawm kalphung in ang tlang leh rualkhai thei ang bera kan neih theih nan Inkhawm programme kalphung tur (Order of service) siam sa hi a theih chen chen zawh tum ila. Tualchhung Kohhran Committee/programme siamtu-in belhchhah leh siam rem duh a neih erawh chuan tha a tih angin a tidanglam thei ang.
- 3) Ni Pawimawh Programme kan hman theih dan chinte a in ang vek lova; Tualchhung Kohhranin tha a tih ang leh a zawh tawh ang zelin chhun lam leh zan lam programme bakah, a aia tam pawh siam belh theih a ni.
- 4) Kumin atana BCM Ni Pawimawh kan hman tur ah hian, thawhlawm/thilpek lakkhawm chhunga sak tur hla thlan sa 4 chauh tarlan a awm a; hun changtu ten mangnghilh loh tur a ni a. Tin inkhawm Thupui tarlan a awm loh chuan Tualchhung Kohhran Committee/ hun changtu ten tha an tih anga kalpui tur a ni ang.
- 5) Pathianni Zing leh Zan inkhawmah hian Special Number awm thei thin se. Kohhran Zaipawl, Fellowship hrang hrang, Group leh Solo bakah Skit-te pawh neih theih ni se a tha hle ang. Special Number bik hi Kohhran thenkhat chuan Worship & Music Committee kutah dahin, an-nin chanvo nei tur an lo ruahman lawk thin.
- 6) BCM Assembly 2011 leh 2019 in a rel angin Pathian biak inkhawmah hian Inkhawm Hruaitu neih theuh ni se. Hruaitu chu Thuhritu nen Pulpitah thu dunin, thuhritu ding lamah a thu ang.
- 7) Kohhran thil pawimawh then khat, Nauhlan leh Pathian biak inkhawm chung ngeia zeh tel duh dang, Order of Service duan lawk chhunga tarlan vek hleih theih loh a awm thin a. Inkhawm hruaituin ruahmanna fel tak siam thin se. Heng bakah hian Thuchhiar inchhawn (*responsive reading*) leh Tawngtaina chi hrang hrang, Kristian Hlabu amite hi inkhawm hruaitu leh thuhritu ten tul an tih anga hman theih a ni tih hre bawh ila.
- 8) Kuminah hian Palm Sunday leh Martarte Ni a inrual avangin, chhun lamah Palm Sunday programme hman ni se, zan lamah Martarte Ni programme hman ni se. Chutiingin Easter Sunday leh Harhna thlen champha pawh Kohhran Committee tha tih anga kalpui ni se.
- 9) BCM Ni pawimawhte hi Kohhran ten ngai pawimawhin kan zawh tawh ang zela hman leh tihlawhtlin hram i tum ang u.

**INKHAWM DAN TUR KALPHUNG
(ORDER OF SERVICE)**

1. Pathian chibai buk tura sawmna (*Call to worship*)
2. Hla sakho
3. Tawngtai
4. Bible chhiar
5. Secretary thupuan
6. Hla sakho (*Thilpek lak khawm nghal ni se*)
7. Thilpek hlanna
8. Special Number
9. Thuchah
10. Hla sakho
11. Tawpna (*Tawngtai/Malsawmna*)

Note :

1. *BCM Ni Pawimawh (Special Day) ah hian thupui neihsa a awm chuan Thuhriltu chu thupui hmang ngeia thuchah sawi tura beisei a ni.*
2. *Hla sak tur, Bible chhiar leh thuchahte hi kan Ni hman nena inhmeh ngei tur thlan hram ni se.*
3. *Pathian biak inkhawmah hian mipui chanvo tam zawk neih theih dan ngaihtuah thin ni se. Kan boruak azirin zaiho leh tawngtairualte pawh zeh tel/belh zel theih a ni.*

NI PAWIMAWH ZAWNAWLNA

Sl.No. Ni Pawimawh		Thla	Ni	Phek
1. Kumthar Ni	-	January	1 (Zirtawpni)	5
2. Missionary Day	-	January	11 (Thawhtanni)	6
3. NCCI Day	-	January	17 (Pathianni)	7
4. Phar Pual Pathianni	-	January	31 (Pathianni) *	8
5. BWA Day	-	February	7 (Pathianni) *	9
6. Kristian Hospital Ni	-	February	21 (Pathianni) *	10
7. Missionary Thlen Champha	-	March	8 (Thawhtanni)	12
8. Tumkau Pathianni	-	March	28 (Pathianni)	13
9. Martarte Ni	-	March	28 (Pathianni)	14
10. Good Friday	-	April	2 (Zirtawpni)	15
11. Easter Sunday	-	April	4 (Pathianni)	16
12. Harhna thlen champha	-	April	4 (Pathianni)	17
13. KNP Day	-	April	23 (Zirtawpni)	18
14. Buhfaitham Pathianni	-	April	25 (Pathianni)	19
15. BKHP Day	-	May	2 (Pathianni)	20
16. BMP Day	-	May	4 (Thawhlehi)	21
17. Kristian Chungkaw Ni	-	May	16 (Pathianni)	22
18. Thlarau Thianghlim thleni	-	May	23 (Pathianni)	23
19. TKP Ramthim Ni	-	May	29 (Inrinni)	24
20. Relief Sunday	-	June	20 (Pathianni)	25
21. Mission Sunday	-	July	4 (Pathianni)	26
22. TKP Day	-	July	30 (Zirtawpni)	27
23. NEICC day of Prayer	-	October	17 (Pathianni) *	28
24. BWA Hmeichhe Tawngtai Ni-	-	November	1 (Thawhtanni)	29
25. Khawvel Sunday School Ni	-	November	7 (Pathianni)	30
26. Naupangte Ni	-	November	21 (Pathianni)	31
27. Rualbanlote Ni	-	November	28 (Pathianni)	32
28. Bible Sunday	-	December	5 (Pathianni) *	33
29. Krismas Ni	-	December	25 (Inrinni)	34

Hriattur:

1. Star (*) mark awmna a thawhlawm hi Hqrs. ah thawn tur a ni a.
Phar pual Pathianni leh Bible Sunday thawhlawm te erawh chu mahni awmna Branch leh Chapter-ah te thehluh tur a ni

KUM THAR NI
January 1, 2021 (Zirtawpni)

Thupui siam a ni lova, Tualchhung Kohhranin tha a tih anga kalpui tur a ni.

Kum 2021 chhunga BCM Ni pawimawh hmasa ber Kumthar Ni Pathianin min lo hruai thleng leh ta a, a ropuiin a lawmawm hle mai. Kan la hmuh ngai reng reng loh hun thar/ni thar min pek avangte, kumtluana min hruaina leh malsawmna tam tak min vur avangin Pathian hnenah lawmthu sawi ila. A hruai leh zelna dil chungin, a hruai theih tura mahni inhlan tharna nen vawiinah hian Lalpa ke bulah i kun theuh ang u.

Mitinin hlim leh nuam titlang taka he ni kan hman theihna turin Tualchhung Kohhran tinin fimkhur leh uluk takin programme ruahman ila. Inkhawm, zaikhawm bakah a huhova lawmthu sawi leh inhlantharna hunte buatsaihin, intihhlimna leh kan zawh tawk ang zel boruak tha leh hlung hman i tum theuh ang u.

Tawngtai thupui :

- 1) Kum 2020 kum tluana min hruaina leh malsawmna tam tak min pek avangte, kumthar ni ropui tak min hruai thlen leh tak avangin Pathian hnenah lawmthu i sawi ang u.
- 2) Kumtharah hian hlawk leh tangkai zawka Pathian ram tana kan inhman theihna turin.
- 3) Kan Kohhran chhungkaw tin ten tisa leh thlarau lam malsawmna, a hruaina leh venhimna kan chan theih nan.
- 4) Khuarel chhiatna leh vanduinah chi hrang hrang lakah kan ram hi humhima a awm theih nan.
- 5) Kuminah hian midang tana malsawmna kan lo nih theuh theihna turin Pathian hnenah i inhlan thar vek ang u.

MISSIONARY DAY
January 11, 2021 (Thawhtanni)

Chawhma Inkhawm thupui : Lalpaah chuan lawm fo rawh u (Philippi 4:4)

Zan lam Inkhawm thupui : Lalpaa lawm kan chakna (Nehemia 8:10)

Bible chhiar tur : Isaia 51:7-8 ; Sam 111:1-2

Thu chhiar chhuah tur:

Kumin January ni 11 hi Mizoram sorkarin *'Missionary Day'* ti a ram pum huap chawlh (State Holiday) a a puan kum 1989 atanga chhiara kum 33 na a lo ni ve leh ta reng mai. January 11, 1894 kha Zosap Missionary hmasaber te pahnih, Sap Upa leh Pu Buanga (FW Savidge leh JH Lorrain) ten chanchin tha hril tura Mizoram leilung an rawn rah tan ni kha a ni a. Hemi ni atang hian chanchin tha chuan eng tik lai maha chhuahsan tawh lo turin kan ram chu a cham chilh hlen ta a ni. Chuvangin Mizorama Kohhran lian pahnih, Baptist Church of Mizoram (BCM) leh Mizoram Presbyterian Kohhran (PCI) te chuan Mizorama chanchin tha lo thlenna niah pawmin, Kohhran din tan niah an puang ve ve a ni. Hei vang hian chanchin tha lo thlen kum 50 na pawh kum 1944 ah khan lawm dun a ni a. Heta thawhlawm tlingkhawm atang hian Baptist Kohhran chuan Pathian thu zirna *'Jubilee Bible School'* a din nghe nghe a. Tichuan kum 1994 ah kum 100 na (Gospel Centenary) pawh lungruual taka lawm ho leh niin, hetah hian Mizoram Presbyterian Kohhran lamin, *'Maichama mei chu mit tur a nilo'* tih an hman laiin, BCM lamin, *'Isua Krista chu lei leh van Lalber a ni'* tih an hmang ve thung a.

Missionary Day hi Kohhran mal ta bik ni lovin, Mizorama Kohhran zawng zawng tan a ni a. Kan Zosap Missionary ten Zofate tana thil tha an rawn thlen hi a hluin a ropui em em a, theihngihl phal chi rual a ni lo. Chanchin tha hmangin kan ram hmel hmang chu nasa takin min thlak sak a, kawng tinrenga hmasawna tur lungphum chu min phum sak a ni. Hei vang hian Sorkar, Kohhran leh mipui zawng zawngte hian Missionary Day hi hlut nachang hria ila. Kohhran tin ten Pathian hnena lawmthu sawina inkhawm hunah hmanga, kan hriatreng leh nasa taka kan lawm hi a phu em em a ni.

A tawp berah chuan heng thil zawng zawng rawn thlen tirtu leh, Zofate thim ata enga min hruai chhuaktu chu Pathian a ni tih hre rengin, a hnenah ropuina leh chawimawina zawng zawng i hlan vek ang u.

Tawngtairual thupui :

1. Tuipui ral ram hla tak atanga chanchin tha min hrilhtu Missionaryte min pek avangin Pathian hnenah lawmthu sawi ila. An hnathawh leh chanchin tha kan neih tak avangin lawmthu i sawi ang u.
2. Keini Zofate ngei pawh chanchin tha pe chhuak ve thei dinhmuna min siam avang hian lawmthu i sawi bawk ang u.
3. Mitin ta tur chanchin tha a nih avangin he chanchin tha hi kan buaipui chhoh zel theih nan Lalpa hnenah chakna i dil ang u
4. Chanchin tha zara lawmna leh malsawmna kan chan zel theih nan Lalpa i dil ang u.
5. Lalpa tana thawk zel thei turin mahni i inhlan thar theuh ang u.

NCCI DAY
January 17,2021

Thupui : Krista Isuaah chuan in zain pum khat in ni si a.
Bible chhiar tur : Galatia 3 : 28 ; 1Korinth 12 : 12-14 ; 26-27

India rama Kristian Pawl hrang hrang te min hum khawmtu Pawl lian ber chu National Council of Churches in India (NCCI) hi a ni a. Kum 1914 ah National Missionary Council hming pu a din tan niin, 1923 khan a inrelbawl dan tidanglamin National Christian Council of India, Burma and Ceylon ti a hming thlak a ni a. Tichuan Burma (Myanmar) leh Ceylon (Sri Lanka) ram ten an chhuahsan hnu ah kum 1979 khan tuna a hming put lai, National Council of Chuches in India ti a thlak a ni leh ta a ni.

India rama Protestant Kohhrante, Orthodox Kohhrante, State hrang hranga Kohhran inzawmkhawm rorelna (*councils*) leh rawngbawlina hrang hrang thawk tura pawl ho (*agencies*)te thawhhona leh inpawlhona a ni. Heng Pawl hrang hrangte rawngbawlina leh rorelnaah erawh a inrawlh lova, a thuneihna pawh a hmang chuang lem lo.

BCM Assembly (2007) rorelnain NCCI a member nih ve dan ngaihtuah ni se ti a a rel chu kan hotu ten bawhzui nghalin, Kum 2008 ah BCM chu NCCI Member pakhat pawm kan lo ni ve ta a. Tichuan NCCI Sunday hmang ve tura min ngenna angin tunah chuan January thlaa Pathianni vawi 3 na (*third sunday*) hi kum tinin BCM chuan NCCI Day atan kan lo hmang ve ta a ni.

NCCI thiltih tumte :

1. India rama Kohhran hrang hrang ten thiltih puitlin tur thuhmun an neihte tipuitling thei tura sawiho leh inrawnkhona an neih theihna tura kawng buatsaih sak.
2. India ram Kohhrante zingah inpumkhatna chawisan leh a huhova mihring khawsaknaah in unauna tha a awm theih nana thawh.
3. Kohhran rawngbawlina (*mission*) chu mihring nun peng hrang hrang nena inzawmna neia kalpui tur a ni tih mipuite zirtir.
4. Kohhran hote, vantlang tana thatna, hmasawmna, lehkhazirna, mipuite hriselna leh miretheite dawmkanna tura hna thawk tura zirtir.
5. Kohhran hote, mipui vantlang leh pawl hrang hrangte thlavang hauhva, sorkar, India ram chung leh pawna pawl hrang hrangte hmachhawn tura din sak.
6. Miretheite leh, India rama Kristian pawl hrang hrangte mamawh tihpuitlinna kawnga harsatna/daltu awm apiangte sukiang tura tanpui leh thawhpui thin.
7. India ram chung leh pawna Kohhran inzawmkhawm hote leh World Council of Churches te thawhpua inrawnkhona neihpui.

PHAR PUAL PATHIAN NI
January 31, 2021

Thupui : I duh chuan mi tithianglim thei e (Marka 1:40-41)
Bible chhiar tur : 2Lalte 5:9-10 ; Marka 1:40-41
Hla sak tur : Isua Kros mak tak chungah khan (KHB No. 187)

Phar pual Pathianni (*Leprosy Sunday*) hi kum 1943 atangin kan Kohhran chuan kan lo hmang tawh thin a. Amaherawhchu, The Leprosy Mission chuan January thlaa Sunday hnuhnung ber hi TLM Sunday atan a hman thin avangin, kum 2005 BCM Assembly chuan he ni hi hman ve tawh turin a rel a. Tichuan kum 2006 atang chuan Assembly rel angin kumtin January Pathianni hnuhnung ber hi TLM Sunday atan kan hmang ve ta zel a ni.

Phar zinga rawngbawlna tak tak hi BCM chuan kum 1975 atangin kan Missionary Rev. KD Siamlianate nupa hmangin kan thawk tan a. Vawiin thlengin he Missiona thawktute thahnemngaihna zarah rawngbawlna nung leh hlawhtling tak a la ni reng a ni. Tunah hian Bethani Colony Leprosy Association (BCLA) nen thawk hovin, Andra Pradesh State a Guntur District chhunga Block Hqtrs pakhat, Bapatla khuaa Bethany Leprosy Colony ah kan bung ve mek a. Hei hi India rama Phar Colony lian ber a ni. He hmuna chengte hian tidamtu ropui Isua Krista an lo hriata, tisa leh thlaraua damna an lo chan zel hi kan duh a ni. Hei bakah hian Mizoram chhunga phar natna veite zawn chhuah, enkawl, chhawmdawl leh Krista hmangaihna hriattir tuma beih hi TLM Mizoram thil tum lian ber pakhat a ni a. Thahnemngai taka min thawhpui zel turin Kohhran mi zawng zawng kan in sawm nawn leh a ni e.

Note : Phar pual Pathianni Thawhlawm hi TLM rawngbawl nana hman tur a ni a. BCM Thawhlawm luh dan pangngaiin BCM Headquarters Office ah thehluh tur a ni a. Aizawl leh Lawngtlai Area a awm ten ES Office kaltlanga thehluh tur a ni.

**BAPTIST WORLD ALLIANCE (BWA) DAY
FEBRUARY 7, 2021**

Thupui : Nang malsawmna ni ang che.
Bible chhiar tur : Genesis 12 : 1-3

Vawiin hi BCM Ni pawimawh zinga pakhat BWA Day a ni a. Khawvel ram hrang hranga Baptist mi leh sa ten inzawmkhawmna mumal tak an neih hma pawhin, Khawvela chanchin Tha hril darh tura thawhho leh inpumkhatna tha tak neih duhna Kohhran hruaitute thinlungah a lian hle tawh thin a. Chutiang ni thei tura hma latu mi ropui tak tak leh ram hrang hranga Kohhran inzawmkhawm Pawlthe hmalakna zarah, kum 1905, July ni 17 khan London khawpuia Exeter Hall ah khawvel pumpuia Baptist Kohhran inzawmkhawm pawl (BWA) chu a lo piang chhuak ta a ni. He Baptist Congress hmasa ber hi July ni 17-19 chhungin neih a ni a. Meeting kaihruaitu (Chairman) chu Scottish mi, Dr.Alexander Maclaren a ni. Hetah hian hruaitu turte thlan nghal niin, President hmasa ber atan John Clifford, London ami chu thlan a ni a. Secretary atan mi pahnih, Dr.JH.Shakespear leh American mi Dr.JN.Patridge te thlan an ni. He Congress hmasa berah hian ram hrang hrang atangin palai mi 3500 vel zet an kal khawm a.

Tunah hian BWA hian khawvel ram hrang hrang 125 atanga member 47500324 neiin, Tualchhung Kohhran pawh 177000 zet a nei a ni. BCM hi kum 1978 atangin member kan ni ve tan a. Kum 5 dan zela neih Inkhawmpui lian (BWA Congress) ah a remchan dan angin Palai leh Zaipawlthe pawh kan tir ve thin a ni. BWA Day hi February thla Pathianni hnunung berahte, May thla Pathianni hmasa berahte kan lo hmang tawh thin a. Kum 2016 khan BCM Administrative Committee chuan kum tin February thla Pathianni hmasa bera hman turin a rel fel ta a ni. BWA kaltlang hian khawvel pumpui kan hma a. Taksaa kan thlen vek phak loh hmun tam takah mite tan rawng kan bawl reng a ni tih i hria ang u.

BWA in tihputlin a tumte :

1. Baptist Kohhran hote inpumkhatna chhawm nun zel a, an zingah thawhhona tha neihtir.
2. Chanchin tha hrilhna lama Kohhrante tih nun zel.
3. Chhawmdawlina leh hmasawmna lama thawh.
4. A ram mite Kohhran hruaitu tha ni tura buatsaih.
5. Pathian duhzawnga dikna leh mimal zalenna humhim leh, chi inthliarna dodal, human Rights a awm theih nana thawh.
6. Khawvel danglam zelah Pathian thudik puanchhuah leh khawvela retheihna tibo tura hmalak, remna leh muanna a awmna tura thawh.
7. Thalai leh hmeichhiate rawngbawlina tih chak.

KRISTIAN HOSPITAL NI
February 21, 2021 (Pathianni)

Thupui : Nang pawh chu ang bawk chuan va ti ve rawh (Luka 10:37)
Bible chhiar tur : Isaia 58:6-8 ; Luka 10:25-37
Hla sak tur : Engvangin nge mipuite chu (KHB No. 260)

Thu chhiar chhuah tur :

(Thilpek lakkhawm hma hun remchangah chhiar chhuah tur a ni)

BCM in tihdam rawngbawlina hna kan thawh hi kan Missionary hmasaberte, Sap Upa leh Pu Buanga te rawn tan kha a ni a. Kan ram thim tak rawn su eng tute hian a tir te atangin an rawngbawlina kipui pakhtah an lo hmang tawh a ni. Hospital tak hi chu kum 1923 February thla a tan a ni a. Tichuan Hospital hi kum za a tling dawn tep ta a, a kum zana Jubilee, centenary kan lawm thei tep a, kan in buatsaih tan mek a ni.

Tun dinhmunah hian Serkawnah khum 100 awmna Hospital changtlung ve tak kan nei a. Mizoram chhim lama Hospital dangte la neih loh natna khirh enkawlina thenkhat, ICU-te, Dialysis leh zunkawng leh Kala lungte awm chhut kehna leh helam enna khawlte, zai hawng lova a verha kawchhung zai theihnate kan nei tawh a, Pathian hruainain hma kan sawn ve hlek hlek a ni. Lawngtlaiah khum 40 awmna Hospital kan kalpui mek bawk a; thawktu indaihlohna avangin duh angin a la changtlung tawh lova, dawhthei takin nghak ila, Pathianin min hruai anga, Lawngtlai Hospital pawh tichangtlung tura hma lak mek zel a ni e.

Serkawnah hian Nursing School kan nei a; Mizorama Nurse zirna hmasaber, kum 1919 a bul lo tan tawh kha a ni a. Tunah hian Nursing College a hlankai tura hma lak mek niin, ruahmanna ang chuan tuna Nurse zirlai awm mekte hi GNM course zir hnunungber an ni tawh dawn a, kumtharah chuan B Sc nursing kan zirtir tawh dawn a ni.

Hospital hian Doctor thiam (Specialist) kan mamawhzia mitinin kan hria a, Doctor thiam kan neih theihna turin nasa takin Kohhran hote kan tawngtai a nih kha. Kan tawngtai chhanna kan hmu a, kan Doctor thenkhat ten Specialist zirna an hmu ta a. Tunah hian Doctor 5 laiin an zir mek ta a; kumin kum laihawlah pakhat chu a lo chhuak thei anga, a dang pawh nakkumah an lo chhuak anga. Midangte pawhin zirna seat an hmuh zel kan beisei a; kum reiloteah Hospital changtluk tak kan ni ve thuai dawn e. Tun dinhmun takah hian zirna sang zawka kan kal chhuah nual avangin Doctor kan indaihlo deuhva, reiloteah kan zia ve leh mai ang.

Hospitalah hian damlo, sum lama harsa ve tak takte kan enkawl thin a, hengte hian enkawlina inthlahrung lova an lo dawn ve theih nan, harsa-te pual Poor Patient Fund kan neih hi a tangkai hle a. Kum kal ta (2019-2020) chhunga mimal thahnemngaite leh Kohhran thawhlawm atanga in rawn chhunluh kha Rs.24,20,357/- lai a ni a, damlo engemawzat, Rs.17,47,045/- laiin tanpui an ni a, a lawmawm takzet a ni.

Samari mitha anga mi harsa, natna tawkte tana rawngbawlina, Pathianin Inthawina ka duhzawng chu hei hi, a lo tih, midangte, mi harsa leh natna tuarte, mangangte tanpuina POOR Fund ah hian he inkhawm thawhlawm pawh hi a lut leh dawn a; thahnemngai taka thawh leh turin kan insawm a ni e. Kohhran hote Lalpan malsawm che u rawh se.

Tawngtai rual Thupui :

- 1) Kan Hospital hi mi tam tak tana tisa leh thlarau damna hmun a nih zel theih nan.
- 2) Doctor, Nurse leh Hospitala thawktu zawng zawngte hian Isua Krista rilru putpuia lainatna dik tak nen damlote an enkawl theih nan.
- 3) Mithiam (Specialist) thawktu kan neih belh zel theih nan leh tuna zir mekte tan.
- 4) Nursing College tur hi a hun taka kan inpeih chhuah theih nan.
- 5) Hmunpui zawk leh phai lam pan theilo, mi rethei leh harsa zawkte tan kan Hospital hi Pathianin a hman zel theih nan.
- 6) BCM Medical & Health Departmenta thawktu zawng zawngte tan.

MISSIONARY THLEN CHAMPHA
March 8, 2021 (Thawhtanni)

Thupui : Ka awmdan zirtute lo ni hlawm rawh u. (Philippi 3:17)
 Bible chhiar tur : 1Korinth 4: 15-16 ; Philippi 3 : 14-17

Mizorama Missionary hna thawk hmasaber (Pioneer Missionary) te, Sap Upa leh Pu Buanga ten kum 4 chhung Mizoram hmar lamah bul tana, hriatreng tlak thil ropui tak tak min tihsak hnu-in Mizoram an chhuahsan a tul ta si a. Sap ramah hawngin hmun dangah rawngbawla an awm ren rawn hnu-ah BMS lamin Mizorama thawk turin an sawm leh ta a. An duhthusam hmun ngei a nih avanga lawm taka pawmin kum 1903, March ni 8 ah Tlabung an lo thleng leh ta a. March ni 13 ah Lunglei lo lut lehin, Serkawnah an inbengbel ta a. Hemi atang hian Mizoram chhim lama BMS rawngbawlina chu a lo in tan ta nghal a ni.

Kum 1989, BCM Assembly rorelna chuan BMS in chhim lama rawngbawlina an rawn tan hun hi ngaihhlut leh hriatreng tlak ni a hriain, 'Chhim lama Missionaryte thlen ni' tiin Lunglei an lo luh ni chu Kohhrana thawktute chhuti ni (Office chawlh) atan, kum 1990 atanga hman tan turin a puang ta a. Hun engemawchen hman anih hnu-ah, kum 1996 Assembly rorelna bawk chuan hei hi ngaihtuah nawn lehin, Missionary ten Tlabung an lo thlen ni chu Chhim lama Missionary thlen ni atan hman zawk ni rawh se, a tih angin, 1997 atangin 'Missionary thlen champha' tiin March 8 ni chu BCM Ni Pawimawh zingah a dah leh ta zawk a ni.

He ni puala hun hmang thei tur chuan thupui tarlan hmang hian thuchah sawi ni se, Tualchhung Kohhranin tha a tih angin Programme kimchang chu siam mai tur a ni.

**TUMKAU PATHIANNI
(PALM SUNDAY)
March 28, 2021**

Thupui siam a ni lova, Tualchhung Kohhranin tha a tih angin kalpui tur a ni.

Tumkau Pathianni (Palm Sunday) hi Khawvel ram hrang hranga ringtute zingah Kristiante ni pawimawh leh ropui tak a nih anga serh a ni. Chuvangin Pathianni pangngai ang mai ni lovin, a hranpa ngata programme te pawh siam thin a ni. Zoram ringtute pawhin kan Missionaryte kaihhruaina hnuaiah he ni hi Kohhran ni pawimawh takah kan dah chho zel a. Lal Isua chawimawina Ni bik angah kan ngai hial awm e. Kan hun hman dante in ang vek lo mahse hmun tam takah Kohhran mite, naupang leh puitling ten tumkau kenga khawlai fannate neiin, Isua Lal a nihzia puanna leh chawimawina auhla nen kawng zawhin hun an hmang thin.

Isua Sabengtung no chungu chuanga, Jerusalema lal anga a luhna leh mipui tam takin an lo lawmna hi, vantlang zinga ropui taka chawimawi a hlawnha kan hriat chhun a ni mai awm e. Hun dangah hetiang taka thukhat vuaa mipuite lawm leh chawimawi a hlawnha sawi tur a awm lo. Hun khirhkhan tak tak leh kawng chep tak zawha, a damchhung ni a hman laia lal a nihzia puan chhuahna leh chawimawi a hlawnha hun hian, amah ringtute thinlungah thu a sawi thuk em em a. He hun hriatrengna leh chhunzawm zelna anga kum tina Tumkau Ni kan lo hmang ve hi Pathian lawm zawng a ni ngei ang.

Kohhran ten Tumkau Pathianni hi eng hun lai atangin nge an lo hman tan tih hriat a harsa a. Rin dan chuan kum zabi 4-na lai velah khawchhak ram Kristian ten an lo hmang tan tawh a, khawthlang ramte chuan kum zabi 8-na velah an hmang tan ni a sawi a ni.

Vawiinah hian kan nunah Lal a nihzia puang nawn leh a, zah leh chawimawi tlak a nihzia kan lantirna turin, Kohhran ho ten kan phak tawka tha-in programme buatsaih i tum theih ang u.

MARTARTE NI
March 28, 2021

Thupui : Thawhleha tha leh zual an chan theihna turin chhan chhuah an duh lo
(Hebrai 11:35)

Bible chhiar tur : Hebrai 11: 13-16 ; 32-38 ; Daniela 12: 3

Martar tih tawngkam hi Greek tawng ni mahse Mizo tawng ang maia kan hman leh kan hriatthiam tlan vek a ni awm e. Keini Kristiante chauh hian kan hmang a ni lova, sakhaw dangte pawhin an hmang a, ram leh Sorkar lam thlengin politics thila ram tan emaw, pawl tana nun chante pawh martar tih an lo ni ve ta zel a. Mahatma Gandhi chu India ram zalenna sual a nasa taka beitu leh thih phah hial a ni a. A thihni October 30 chu Martyrs Day tiin ni pawimawh takah a dah a ni.

BCM in Martarte Ni tia kan hman hi chu Isua Krista an rin leh tan tlat vangte, a chanchin tha avanga tuar leh nun hial hlantu mi hrat khawkhengte kan ngaihhlutzia lantir nan leh, anmahni kan hre renga, an hnen atanga zir tur leh an nuna entawn tur kan neihte chu kan rinna tinghettu atana hmang ve turte, thih thlenga Krista tan rinawma tang tlat thei tura Kohhran hote infuih thar lehna hun atan a ni.

BCM Assembly 2002 rorelna chuan, 'Krista rinna avanga martarte hriatrengna ni hi hman ni se' ti a thu a lo passed angin, March thlaa Pathianni hnunung ber hi Martarte Ni atan kum tinin kan lo hmang ta a ni. Vawiinah hian inkhawmna urhsun tak hmang turin inbuatsaih ila, Krista leh chanchin tha avanga martar huam nun chu kan Kohhran leh mimal tinah hian chi nung anga kui tiah lo ni mawlh rawh se.

GOOD FRIDAY
April 2, 2021

Thupui siam a ni lova, Tualchhung Kohhran Committee in tha a tih anga kalpui tur a ni.

Good Friday hi kan Lal Isua krosa khenbehni a nih avangin keini zofate pawhin Kristian kan lo nih tirh atangin, kan Missionary-te min zirtirna nen, Kristiante ni pawimawh ber pakhat angin kan serh a, kan ngaihluin kan la urhsun em em a ni. Ngaih ropui tur pawh a ni reng a; kan sual avanga Lal Isua, tuarna rapthlak leh mualphothlak ber krosa khenbeh a nihna hi ngawih bopui theih chi rual a ni love. Thinlunga a tuarna tawmpuina mai ni lovin, a thihna zara nunna nei kan nihna chuan lawmna leh hlimna nasa tak min neihtir a. Good Friday hi Kohhran hote tan Thlarau lam malsawmna a thara kan channa ni a ni fo thin.

Chuvangin Inkhawm, zaikhawm leh a remchangte chuan Lalpa Zanriah (Sacrament) kil honate neiin, Lal Isua kan tan a tuar a, a tuarna chuan chhandamna kim min siam sak avanga mi tinin amah kan chawimawi theihna turin , kan thiam dan leh theih ang anga hlung leh urhsun taka kan hman theih nan, Kohhran ho ten uluk takin programme i buatsaih theuh ang u.

EASTER SUNDAY**April 4, 2021**

Thupui siam a ni lova, Tualchhung Kohhran Committee in tha a tih angin a kalpui ang.

Easter Sunday hi Lal Isua thihna hneha a thawhleha ni hriat rengna atana Kristiante ni serh pawimawh a ni. Kristian ten Isua Krista kan chawimawina hunpui pawimwh bik pathum kan nei a. Krismas hi mihringte tan lawmna ni a nih laiin, Lal Isua tan chuan tuarna bulrawn intanna hun a ni a. Good Friday hi mualphona leh tuarna vawrtawp a tawrhna ni a ni ve thung a. Easter Sunday erawh hi chu thihna hneha ropui taka a thawhleha hun a nih avang leh, chu chu ringtute, amah anga an thawhleha tur thutiam nemnghehna, Kristiante thurin inngahna bulpui ber a ni. Tirhkoh Paula chuan, 'Thawhhmahruaitu' tia sawiin, 'Krista kha kaihthawhin a awm loh chuan in rin chu engmahlo a ni ang' (1Korinth 15:17) tiin Krista thawhleha hlutzia leh pawimawhzia a sawi chhuak hial a. Easter Sunday hian sakhaw dang reng rengin an neih ve loh, amah ringtute tana thi a tho leh Pathian thuchah ropui bik a keng a ni.

HARHNA THLEN CHAMPHA

April 4, 2021

Thupui siam a nilova, Tualchung kohhran Committee in tha a tih anga kalpui tur a ni.

Harhna hi Pathian Thlarau hnathawh, englai pawha Kohhranin a mamawh reng a ni. Khawvel hmun hrang hrangah hriatreng tlak harhna hi a lo thleng fo tawh thin a, kan sawi seng lovang. Harhna thenkhat chuan kohhran mai ni lovin, ram leh khawtlang nunphung thlenga sawi danglamin nghawng ropui tak tak a nei bawk a ni. Mizoram kan vanneih em emna chu ram pum huap Thlaraua Harhna bakah ram pum nghawng kher lova harhna bing khawi lai laiah emaw a thleng renga; harhna hian min chen chilh a, kan ram hi a chhuahsan lo ti ila a sual lo hial awm e. Ramdang kristiante aia kan hamthatna leh Pathian malsawmna kan chan a ni takmeuh mai.

Harhna hi Kohhranin a hlawkpui a, hmasawmna leh Pathian ram zauhna hmanraw tangkai tak a ni a. Chutihrualin Kohhranin a buaipuina lai leh mitinin an hriat thiam zawh vek sen loh boruak a keng tel ve deuh zel a. Amaherawhchu a pumpui thu ngaihtuahin harsatna min siam sakna lam aiin Kohhran hote tana hlawkna leh min tih sawtna hi a nasa zawk daih a ni. Chuvangin harhna hi kan ngaiin kan mamawh a, Pathian hnena harhna dila tawngtai leh a dawngtu ni thei tura inbuatsaih hi englai pawha tul reng a ni.

Kum 1904-1905 lai vela Wales ram harhna hmingthang tak a thlen laiin Khasi rama Missionary Rev. John Robert chu Wales rama a hawn lai tak a ni a. Ani hian he harhna hi a rawn paw haw ve tlat mai a. Kum 1906, March 15-18 chung khan Khasi rama thingtlang khaw pakhat Mairang-ah inkhawmpui lian tak nghah a ni a. Hetah hian Pathian Thlaraua harhna nasa tak a thleng a ni. Mizoram chhim leh hmar atangin he inkhawmpui chhim ve tur hian Pu Zosaptharan mi 10 a hruai thla ve a. Anni ho hian inkhawmpui chungin an duh leh beisei ang harhna chang lovin an inhria a; beidawng taka lo hawngin Aizawl an lo thleng leh a. Mahse Aizawl an lo thlen hnu April 4 ah harhna an lo chang ve ta a. Hei hi Mizorama Thlarau Thianglim Harhna hmasaber chu a ni. BCM chuan he Ni hi a ngaihlu a, hriatreng tlakah ngaiin kum 2006 atang khan BCM ni pawimawh zingah a lo telh ve ta a ni.

KRISTIAN NAUPANG PAWL (KNP) DAY
April 23, 2021 (Zirtawpni)

Thupui : Thianghlimna (1Petera 1 : 16)
 Hla sakho tur : Isu i thianghlim e (KHB No.182)

Vawiin hian Kristian Naupang Pawl (KNP) chuan kum 78 a lo tling ve leh ta. Kum 1943, April ni 23 atang khan Zosap Mrs.EM Oliver (Pi Zoduhi) leh Pi Rovi te chuan Upa Committee in a ruat anga hma lain Serkawnah naupang puala inkhawmna mumal takin an neih pui tan a. Kum 1967 Assembly chuan, khawtinah Naupang inkhawm neih ni se, General Committee in a kaihhruaina lo siam rawh se, tiin a rel a.Chutiang chuan Tualchhung Kohhran hrang hrangah an remchan anga naupang inkhawm hi neihpui thin a lo ni ta a ni. Anmahni enkawl leh kilkawi hna chu BKHP te kuatah a awm hmasa ber a. Sunday School leh Christian Education Department ten an in enkawl chhawk zar zar hnu ah, kum 2001 BCM Assembly chuan Fellowship Organisation Department hnuuia Fellowship pakhat angin a dah leh ta a. April ni 23 hi KNP Day atana pawmin, kum tinin BCM Ni Pawimawhte zinga pakhat a lo ni ve ta a ni. Inkhawma hun hmang theite tan thupui siam a ni a. Naupangte hriatthiam theih tur tawka thuchah kan sawi thiam theih nan hetiang hian thupui then sa dah a ni.

Pathian chu a thianghlim em avangin keini pawh thianghlim ve turin min duh a. Hetiang hian Thianghlimna thu kawng thumin sawi ila.

1. *Thlaraua thianghlimna* : Isua thisen avangin amah ringtute chu kan sual zawng zawng min ngaihdam sakin, kan thlarau nun Lalpan a tithianghlim tawh a ni.
2. *Rilru thianghlimna* : Kan rilru a thianghlim tur a ni. Mi itsikte,mi huatte hi Pathianin a phal lo. Pathian kan hmangaih tur a ni a, midangte pawh kan hmangaih tur a ni. Hmangaihna hi rilrua thianghlimna a ni.
3. *Taksa thianghlimna* : Kan taksa hi thianghlim takin kan enkawl tur a ni. Inbual fai, thawmhaw fai inbel, ha leh ka chhung tihfaite a pawimawh a, kan in leh a bul velte pawh fai takin kan enkawl tur a ni. Kan taksa a lo thianghlim zawk theih nan zuk leh hmuam, zu leh drugs lakahte kan in thiar fihlim tur a ni.

Tawngtai rual thupui :

1. Thilpek hlanna.
2. Mizo naupangte kawng tinrenga kan lo thianghlim theih nan.
3. Zuk leh hmuam, Zu leh Drugs, ruih hlo leh sual tinreng laka kan fihlim theih nan.
4. Pathianin min beisei anga kan invawn thianghlim zel theih nan.

BUHFAITHAM PATHIAN NI
April 25, 2021

Thupui_ : Sem darh chu pun lehzualna a ni. (Thufingte 11 : 24a)

Thu chhiar chhuah tur : (BKHP lam atangin chhiartu tur ruat ni se)

Buhfaitham hi kum 1915 ah tham a ni tawh a. Mahse Presbytery minute ah chuan kum 1919 hi a lanna hmasa ber a ni. Hei hi FW.Savidge (Sap Upa) reporta a landan a ni. Kum 1919 a Presbytery chuan Hmeichhe tirhkoh hlawh chu Buhfaitham atanga an pek thin thu a tarlang a . Hmeichhe tirhkoh an awm loh hnu chuan Kohhran sumpuiaah a lut vek a, a tul ang anga hman a lo ni leh ta a. Kum 1947 a Nursery School din a nih khan Buhfaitham pawisa chu zirtirtute hlawah hman a ni a, Nursury School awm loh hnuah sumpuiaah bawk a lut leh a ni. Kum 1968 ah BCM Missionary hmasa ber Rev.Rokhama te nupa Rabha ho zinga an thawh atangin Buhfaitham pawisa hi Missionary chawm nan hman a ni a. Kum 1973 atangin BCM Assembly chuan Buhfaitham rawngbawlina hi BKHP kutah dahin, BKHP ten an khawn a, Kohhranin a buaipui thin a. Kum 1982 atang chuan mawhphurhna zawng zawng BKHP kutah a lo dah ta a. Buhfaitham atanga sum hmuh chu Tualchhung Kohhran kaltlangin Mission lamah thehluh a ni. Buhfaitham kaltlang hian Missionary tam tak BCM in a tir chhuak a, thlarau bote hnena chanchin tha kan hrilh theihna hmanraw tangkai leh pawimawh tak a ni.

Buhfaitham hmanga rawngbawlina hian a huap zau hle a; tar chaklo, lehkha zir sang lo leh naupang tan pawha tih theih a ni. Zing leh tlaiah chungkuain chaw kan chhum phawt chuan, chaw chhumna bela dah ruala Buhfaitham bur/bela Lalpa Pual kan han dah hi, awmhmun atanga rawngbawlinaa kan tel ve theihna kawng awlsam te, tangkai em em bawk si a ni a. Chhungtinte hian he rawngbawlina pawimawhzia hi hre thar leh ila, kan tu leh fate I zirtir uar sauh sauh ang u. Kum 2019-2020 a Buhfaithama kan hmuh zawng zawng chu Rs. 853,67,328/- a ni a. Chhungtinte inphalna leh enkawltute inpekna zarah Buhfaithamin hma a sawn ve zel hi a lawmawm hle mai. Kohhran ten rawngbawlina pawimawh tak a nihzia hre chungin i in zirtir uar zel ang u.

Tawngtai rual Thupui :

- 1) Buhfaitham hmanga rawng kan bawl ve theih avangin lawmthu sawi ila.
- 2) Buhfaithamah hma kan sawn zel avanga lawmthu sawi chungin, hma sawn zel tur pawhin i dil ang u.
- 3) Buhfaithama mawhphurtu BKHP te tan tawngtai ila.
- 4) A buaipuitute leh a khawntu ten Pathian rawngbawlina pawimawh tak a nihzia hre chungan chhunzawm zel theih nan dilsak bawk ila.
- 5) Chhung tin ten Buhfaitham hlutna leh tangkainate kan lo hriat thar a, kan ngaih pawimawh zel theih nan i dil ang u.

NB : *Inkhawmnaah hian BKHP Zaipawl hlarem leh Tualchhung Buhfaitham dinhmun Report an hnen atanga ngaihthlak beisei a ni.*

BAPTIST KOHHRAN HMEICHHE PAWL (BKHP) DAY
May 2, 2021 (Pathianni)

Thupui : Tho la, i Pathian ko rawh (Jona 1 : 6b)

Chanchin Tha avangin Mizo hmeichhiate dinhmun nasa taka chawikanin a awm a. Chu chanchin tha thiltihtheihna chuan Mizo hmeichhiate zingah rawngbawlna kawng a hawn sak a. BCM hnuai hmeichhe rawngbawlna hi kum 1938 March thlaah, Girl's Auxiliary (GA) atanga intanin, kum 1947 ah *Nu Pawl* din a ni leh a ni. Chutia *Nula leh Nu Pawl*, thuang hniha hmeichhe pawl ding chu Assembly hotu te chuan fel tawk lovin an hria a. Heichhe rawngbawlna a chak zawk theihna tur leh thil a kal that zawkna a nih beiseiin, kum 1965 khan hmeichhia zawng zawng huap turin, *Baptist Kohhran Hmeichhe Pawl* din a lo ni ta a ni. March ni 20 hi BKHP Day ah kum 1966-1989, kum 23 chhung zet hman a lo ni thin a. Hei hi MBKHP Executive Committee chuan ngun taka ngaihtuahin Assembly General Committee ah a thlen chhova, Committee chuan uluk taka a chhui hnuah *Mizoram Baptist Kohhran Hmeichhe rawngbawlna awmze neia a din chhuahna chu*, Kum 1938 May ni 2 hi a ni e, tiin, he Committee remtihna kum 1990 atang chuan BKHP Day atan May ni 2 hi hman a lo ni ta a ni. Kumin hi BKHP Day vawi 83 na a ni.

Hun hman dan tur :

1. Kuminah hian BKHP Day hi Pathianni a nih avangin, a hman dan tur chung chang pawh Unit BKHP Committee in uluk deuh zawka a thlir a tul ang. Chhun/zana hmang turin Tualchhung Kohhran Committee nen inberawnin ruahmanna siam tur a ni.
2. Programme kimchang chu Unit BKHP Committee kutah awm se.

Tawngtairual thupui :

1. MBKHP Hruaitute tan.
2. Bial leh Unit BKHP Hruaitute tan.
3. BKHP member zawng zawngte tan.
4. MBKHP Chhawmdawlina in leh Drop-In Centre a thawktu leh enkawl laite tan.
5. Loisu Editorial Board memberte tan.
6. Mizorama hmeichhe rahbi tlute leh sualna chi hrang hrangin a bawh buai mekte tan.
7. Hmeichhia ten rawngbawlnaah hma kan sawn zel theih nan.

BAPTIST MIPA PAWL (BMP) DAY
May 4, 2021 (Thawhlejni)

Thupui : Thlen chin atanga hmasawn zel (Philippi 3 : 16)

Baptist Mipa Pawl (BMP) hi Mizoram Baptist Kohhran Assembly 1998 in Tualchung Kohhran hrang hranga din a lo rem tih leh, BCM Assembly 2011 in Bial huapa din a lo phal sak tawh a ni a. Tualchung leh Bialahte din a lo nih hian Pawl tangkai tak, BCM rawngbawl naa kut ke pawimawh tak a lo ni ta a. BCM Assembly 2005 in din tan ni atana a pawm, May 4, 1980 atanga chhiar chuan, 2021 BMP Day hi kum 41 a tlinna a lo ni ve ta reng mai. He Pawl kaihruaitu Lalpa chu fakin awm rawh se.

BMP Day 41 na hi BMP Unit tin ten hlim leh hlung taka hman theuh tum ni se, Hqtrs. lam atangin Thupui thlan bak programme kimchang siam a ni lova. Mahni Unit theuhvin tha a tih anga programme chu siam mai tur a ni e. He Ni hman pui tur hian Kohhran Hruaitute leh Kohhran hnuai Fellowship hrang hrangte sawmin, chanvo te pawh siam sak ni se a tha hle ang.

KRISTIAN CHHUNGKAW NI

May 16, 2021

Zing lam thupui : Lungpui chung sak In chu (Matthaia 7:25)
 Zan lam thupui : Anmahni chu an rahah in hre mai ang (Johana 13:35)
 Bible chhiar tur : Matthaia 7:24-27 ; 15-20; Johana 15:4-5

Mizoarm Baptist Kohhran chuan kum 1948 atangin Kristian chhungkaw Ni hi kan lo hmang tawh a. He ni hi Kristian chhungkaw din pawimawhna leh hlutnate, Pathian thu anga chhungkaw enkawl a tulzia inzirtirna hun atan hman thin a ni. Lal Isuan ringtute chu rah chhuah nun nei turin min zirtir a. Midangte tana nunga, thil tha pe chhuak turin min beisei a ni. Thuhruk theih loh tlang chhipa khaw awm leh thim zinga khawnvar chhit en angin min tehkhin bawk . A nih tur ang ni zolo ringtu chu thingchhia, rah tha chhuah theilo ang a ni a; thing thain rah tha a chhuah thin angin, Kristian chhungkaw tha chuan rah tha chhuahin, Kohhran leh khawtlang nun a siam tha a, a awmna hmun tinah Pathian ram a din chhuahpui thin.

Kohhran mite thinlungah ni khat chauh Kristian chhungkaw Ni hman duh khawp lohna a lo lian zel a. Kum 2003-2005 chhunga BCM Assembly rorelna apiangah Kristian chhungkaw chawlhkar hman rawtna lo lutin, hman zel a ni a. Chutianga a zawna tum thum lai ngaihtuah a nih takah chuan, rel nawn fo ngai tawh lo turin BCM Assembly 2005 chuan kum tin Kristian chhungkaw Chawlhkar hman thin ni rawh se,tiin May thlaa Pathiani vawi 3-na, Kristian chhungkaw Ni a hman thin behchhana hman turin a lo rel ta a ni.

Kuminah pawh hian Kohhran chhungkaw tin ten Kristian chhungkaw chawlhkar leh Kristian chhungkaw Ni te hi urhsun taka kan hman leh theih nan, ruahmanna tha lehzual nen Kohhrante inbuatsaih theuh turin a tharin kan in ngen a ni.

THLARAU THIANGHLIM THLENNI
May 23, 2021

Thupui siam a ni lova, Tualchung Kohran Committee in tha a tih anga kalpui tur a ni.

Tirhkohte thiltih bua kan hmuh angin Pentikos ni a zirtirte hnena Thlarau Thianghlim a lo thlen ni atang khan chanchin tha hrih rawngbawl na chu a lo intan tak tak ta a. Huaisen takin Tirhkohte chuan Krosa an khenbeh Lal Isua chu Pathian Fapa Krista ngei a nihzia auchhuahpuiin Thlarau Thianghlim hruaina hnuai ah Judai ram leh Jentile te zingah chanchin tha chu a lo darh ta chum chum mai a nih kha.

Pentikos Ni leh he ni a lo thleng Pa tirh Thlarau Thianghlim hi lei Kohhrante tan a hlu em em a. Khawvel pum huap kristiante Calendar Ni pawimawh kum tina an hman thin chu keini Zoram Kohhrante pawhin a din tirh atangin kan lo hmang ve ta zel a ni. Amaherawhchu BCM Assembly chuan ngun taka a ngaihtuah hnu-ah Judate kut chhawm zui zel anga lang ve ngawt lovin, Thlarau Thianghlim Thlen Ni ti- a hman turin a lo rel leh ta a ni.

Tawngtai rual thupui :

- 1) Kohhran ho min chen chilh tlattu Thlarau Thianghlim avangin Pathian hnenah lawmthu i sawi ang u.
- 2) Ringtute hian thiltih theihna neia rawng kan bawl theihna turin Pathian i au ang u.
- 3) Kan ram hruaitu ten Thlarau Thianghlim zai ngaia ro an rel theih nan.
- 4) Kan ram puma Thlarau harhna a thlen theih nan.
- 5) Thlarau Thianghlim hruai theih turin mahni i inhlan thar leh theuh ang u.

TKP RAMTHIM NI
May 29, 2021 (Inrinni)

Thupui : Thil tha ti atana siam (11Timothea 2:10)
Bible chhiar tur : 1Korinth 9:16

TKP Ramthim Ni hi kumtin May 29 ah hman thin a ni a. He Ni hi kum 2006 MTKP Inkhawmpui rorelna bawhzuia, BCM in ram pawna Missionary a tirh chhuah hmasak ber Rev.H.Rokhama te nupa a tirh chhuah ni denchhena ruat a ni. A tirah chuan Tuikuk-Takam Ni tih niin, October 5, 1959 ah hman tan a ni a; a kum leh 1960 atangin kum tin September 26 ah hun rei tak chhung hman chhoh a ni ta a. A hming hian a huap zim deuha hriatna avangin kum 1969 khan, 'Ramthim Ni'tiin thlak a ni ta bawk. Amaherawhchu, September thla a hman thin hi Beirual thla a nih avangin remchang tawk lova hriatna a lo awm leh a; kum 2007 atang chuan TKP Ramthim Ni tiin May 29 ah hian hman a lo ni leh ta a ni.

A din tirh atangin TKP hian thlaraubo veina (*Missionary Spirit*) lian tak neiin District TKP Inkhawmpui hmasaber, kum 1955 a Pukpuia neihah chuan 'TKP hminga thuhritlu rawih' tih Agenda ngaihtuah nghal a ni a. Mahni remchan dan anga Tuikuk-Takam puala hun hmangin thawhlawm pawh Ramthim pual atan Headquarters ah chhunluh thin a ni. Vawiina TKP memberte hian he rilru pu chhunzawm zel tur hian tan i la ang u.

Tawngtairual thupui :

1. Khawvel hmun hrang hranga Lal Isua chanchin la hrelo ten an lo hriat theih nan.
2. Mission pawl hrang hrang ten an hna thawhnaah Pathian hruaina leh awmpuina an chan theih nan.
3. Lal Isua chanchin tha avanga hrehawm leh tihduhdah tuar mekte tan.
4. BCM Mission Departmenta thawktu zawng zawngte leh an chhungte theuh tan tawngtai sak ila. Kan Missionary zawng zawng ten Thlarau Thianghlim thiltihtheihna hmanga rawng an bawl zel theih nan i dil sak ang u. Tun dinhmunah kan Kohhran hian Missionary 1297 (directa kan tirh 1001, Native workers 296) kan nei a ni.
5. Kan Mission Field hrang hranga ringthar leh Kohhrante tan tawngtai sak ila. Kohhran nghet, midangte vei Kohhran an nih theih nan.
6. Kan TKP member pui Lal Isua la neilo te Isua ke bula kan hruai theih nan.

Hriat tur pawimawh :

1. Order of Service (Inkhawm dan tur) awmsa hi a tul chuan Unit-in hei aia chip chiar leh huapzau zawkin a siasm thei ang.
2. Thipek tlingkhawmte hiBial TKP kaltlangin MTKP ah chhun luh thin a ni a; a hm,anna tur chu MTKP Executive Committee-in a ngaihtuah ang.
3. Tawngtairual hunah hian thupui thawh belh theih a ni ang.

RELIEF SUNDAY
June 20, 2021

Thupui : Rethete ngaihtuah mi chu malsawmin a awm ang. (Sam 41: 1-2)
Bible chhiar tur : Thufingte 14:31; 19:17 ; 28:27 ; Marka 10:21

Tawngtairual thupui :

1. Tanpui ngaite tanpui thei tura Lalpan min la ruat zel avangin lawmthu i sawi ang u.
2. Khawvel hmun hrang hranga chhiatna thleng mekte hian a tuartu teah Isua lam a hawitir theih nan.
3. Tanpuina hna kan thawh zel theihna turin mi inpe, Kohhran mi leh pawn lam thawhpuite Lalpan min pek zel theihna turin.
4. BCM Relief & Development Department hnuiaia thawktu zawng zawng te tan.

Thu chhiar chhuah tur :

Relief & Development Department hi Kohhran leh Pawl, Mimal inpete thilpek leh tawngtaina zarah vawiin thlengin harsatna leh buaina em em nei lovin, tanpui ngaite tanpui leh zirtirna hna thawkin kum 1990 atang khan chawl lovin a la kal ve zel a ni.

Biblea kan hmuh angin ringtute chu tanpui ngaite tanpui turte, pachhiate tuamhlawma, ei tur neilote ei tur pe a, midang tana malsawmna ni tura hriattir kan ni. Chu rawngbawlna chu Lalpa duh zawng tak a ni a, a te ber atanga a lian ber thlenga kan tih theih a ni. Chuvangin Mizoram Baptist Kohhran pawhin he rawngbawlna hi a ngai pawimawhin, chanchin tha hrilh nan , ringtute inpumkhat zel nan leh tihnghehna hmanraw pawimawh takah a hmang mek a ni.

Kan ram dinhmun azirin, mite mangan leh harsat laia tanpuina rang zawka pek an nih theih nan BCM Assembly chuan ruahmannate a siam a. Chu ruahmanna chuan, kangmei, tuilian, thlipui, leimin leh chhan hrang hrang avanga chenna in chan hlauhte tan Rs.2000-3000, BCM Emergency response atan a pe thin a. Heng tanpuinate hi chhiatna tawk an awm veleh, Bialtu Pastor leh Tualchhung Kohhran Hruaitu ten an kuta pawisa remchang awm atangin an lo pe thuai thin a. Chu chu BCM Relief and Development Budget atangin rulh leh thin an ni.

Tin, hei bakah hian natna khirh khan bik tuarte, Chhungkuuaa enkawl reng ngai rualbanlote, Home leh Hospitala awm tanpui ngai zual bik nia hriatte leh, khuarel chhiatna nasa zawk a awm changa, pawn lam atanga puihna a harsat chang atana hman tur BCM Charity Programme buatsaih , he programme atana Kohhran, Pawl leh mimal thahnemngai te thilpek tlingkhawm chu tanpuina atan hman a ni bawk thin.

Tin, R & D Department hian khawtlang hmasawmna, nu leh naupang dikna chanvo leh hmasawmna programme te, huan/lo neitute hmasawmna turte, thalaite thiamna leh eizawmna tur ngaihtuahpuite, khawtlang hriselna lam inzirtirte, khuarel leh mihringte siam, chhiatna thleng thei tihlem leh inven dan zirtir thlengin a hma a ni. He rawngbawlna tawmpuia kan tel theuh theihna tur hian Thilpek leh Tawngtaina hmanga theitawp min chhuahpui turin Kohhran mipuite thinlung takin kan sawm a che u.

MISSION SUNDAY

July 4, 2021

Thupui : Tun hi hun lawmawm, chhandamna ni a ni (11Korinth 6:2)
 Bible chhiar tur : 2Timothea 5:1-5; Ezekiel 3: 18-21; Thufingte 24:11-12

Mission Sunday hi Mizoram Baptist Kohhran chuan Lal Isua thupek ropui, Chanchin Tha hrilh pawimawhzia Kohhran hote inzirtirna tura a ruahman a ni a. Kohhran rawngbawlina leh Kohhran hote min tichaktu chu chanchin tha hrilh leh thlaraubo man hi a ni. BCM hian a pian tirh phat atangin Mission rawngbawlina hi a buaipui nghal a. Inkhawmpui neih hmasak ber kum 1904 ah chuan ringtu tinin ringlo mi pakhat tal ringtua siam turin a rel a. Kan chhehvela hnam hrang hrangte zingah Pathian thuhritute an in tir tan nghal a ni.

Kan Kohhranin hlawh neia a rawih tirh koh hmasaberte chu Kawha leh Siamate an ni a, anni hi thla khata Rs 12 hlawhin 1939 khan rawih tan an ni. Kohhran mite thinlungah Ramthim veina a lo len tak zel avangin July 12, 1962 ah Ramthim Sub-Committee din a ni ta a. Chu chu duh khawp lovin a aia lian zawk Zoram Baptist Mission (tuna Mission Committee lo ni ta) chu kum 1967 ah din a lo ni leh ta a ni.

Kum 1970 Assembly chuan July thlaa Pathianni hmasaber hi Missionary Sunday tih ni se, hemi ni hian Mission lam hawi thuchahte, kan Mission lam chanchinte leh Missionary rawngbawlina pawimawhziate Kohhran mipuite hnenah sawi thin ni se, tiin a rel a. Hetianga hun rei tak kan kalpui hnu-ah kum 2017 atangin Missionary Sunday tih chu *Mission Sunday* ti a thlak lehin BCM Calendarah leh Ni pawimawh bu-ah te pawh dah nghal a ni.

Tawngtai rual thupui :

1. Chanchin tha pe chhuak thei Kohhrana min din vangin Pathian hnenah lawmthu i sawi ang u.
2. Hun lawmawm leh chhandamna ni hi thlaraubote zawn chhuahna hun tha atana kan hman ngei theih nan Pathian tanpuina i dil ang u.
3. Mission lam rawngbawlinaah nasa zawka kohhrante kan harh zel theih nan.
4. Chanchin thain a la thlen ve loh ramte hnenah chanchin tha hrilh a nih zel theih nan.
5. BCM tirh Missionary zawng zawngte leh a ram mi thawktu kan rawih mek ten veina leh thahnemngaihna thar nen hma an lak theih nan.

TKP DAY
July 30, 2021 (Zirtawpni)

Thupui : Lalpa lam i hawi ang u (Tah hla 3:40)

Hun hman dan tur :

1. Kumin TKP Day hi TKP in kum 70 a tlinna a nih avangin a rem chan chuan hun dang aia urhsun zawka hman tum nise.
2. Unit/Bial tinin mahni remchan angin chhunah emaw, zanah emaw hman ni se. (Committee in tha a tih chuan chhun lama tana, zan lama chhunzawm theih a ni. Committee in min beiseina ang hi tihhlawhtlin hram i tum theuh ang u.)
3. Unit/Bial tinin Kohhran leh khawtlang tana tangkai zawnga hun hmangin, hnatlang (Social Service) neih tum theuh ni se.
4. Inkhawmah hian thawhlawm lakkhawm thin a ni a. Bial kaltlangin MTKP ah theh luh tur a ni a. Thawhlawm hmanna tur chu MTKP Executive Committee in a ngaihtuah ang.
5. TKP Day hi hlung taka hman a nih theih nan mahni Tualchhung Kohhranah thlenin, Fellowship Organisation dangte pawh min telpuia, chanvo (Special Items,etc.) te pawh chang ve tura sawm hi thil tha tak a ni ang e.

TKP Tobul leh TKP Day :

Kum 1951, July ni 30 khan Serkawna Thalai thenkhat leh kohhran Hruaitu Upate chuan kan Zosap Missionary-te duhsakna leh kaihhruaina hnuaiah Thalai Kristian Pawl an din a. Hruaitu hmasate chu -

President : Pu R.Lungruala
Vice President: Pu Vanlalkunga
Secretary : K Lalliana
Treasurer : Pu T.Ropianga

Senior Adviser atan mi pali, Rev.HS.Luaia, Upa C.Saizawna, Zomawia Nu (Mrs.FJ.Rapers) leh Pu Lalmama te thlang chhuakin, heng bakah hian Executive Committee member 5 an awm a. Chungte chu, Nl. Rothuami, Pu Hrangthanga, Pu Lalsawma, Pu Remkunga leh Pu Thanghmuna te an ni. Thalai Pawl din hi Presbytery (tunah BCM Assembly kan ti) in a lo phal sa tawh avangin, Presbytery 1952 Inkhawmpui (Pukpui) rorelna chuan a pawmpui nghal ta bawk a. Tin, Biala din phalna pawh a pek nghal bawk avangin, Pastor Bial hrang hrangah din nghal zel a ni ta a ni.

Hetih lai hian Mizoram hi Assam State chhunga District pakhat mai a la nih avangin Zoram huapa TKP inkhaikhawmna pawh District TKP tih a ni a. District TKP inkhawmpui hmasa ber chu Pukpuiah kum 1955 khan neih a ni. Hun rei tak chhung chu TKP Day atan hian TKP Inkhawmpui hmasaber neih tuma a ni hmasa zawk October ni 22 chu hman a ni thin a. Amaherawhchu he ni hi dik tawk lova hriatna a awm avangin MTKP rorelna in vawi hnih vawi thum a ngaihtuah nawn hnuah, kum 1995 MTKP Rorelna (Sethlun) chuan Kohhran hruaitute leh kan Missionaryte kaihhruaina hnuai a Serkawna TKP an din ni, July 30 hi TKP Day ah hman ni tawh se, a ti a. Chu chu BCM General Committee pawhin pawmpuiin kum 1997 atang chuan TKP Day hi July 30 ah hman a lo ni ta a ni.

NEICC DAY OF PRAYER
October 17, 2021

Thupui : Nangni pawh Grep huanah va thawk ve rawh u (Matthaia 20:1-7)

Kohhran leh rawngbawlina peng hrangte inthlunzawmna tha tak neih hi Pathian ram rawngbawlinaah a tangkaiin a hlawk hle a; chutianga inzawmkhawm pawl chu tam tak a awm. North East India Christian Council (NEICC) pawh hi India hmarchhak State hrang hranga Kohhran leh Kohhran pawn lama rawngbawl (Para-Church) te thawhhona pawl pakhat a ni. Tunah hian hmarchhaka Kohhran 35 leh Para-Church 17 te he pawlah hian member an ni mek. A tira *Assam Christian Council* tih hming pu a din chu, hmarchhakah State hrang hrang a lo piang ta a, State pakhat hmingin a huam zawh tak loh avangin, kum 1962 khan *North East India Christian Council* ti a thlak a ni ta a. He Council hnuaiah hian hmarchhak pum huapa pawl lian tak pahnih, NEICC Youth Assembly (Thalai Pawl) leh NEICC Women Assembly (Hmeichhe Pawl) te chu Office Bearers hrang leh inkhawmpui hrang neiin an awm bawka a ni.

India hmarchhaka Kohhran hrang hrangte thawhhona leh inpumkhatna atana he pawl hi din a ni a. Shillongah Headquarters neiin Full time a thawk Secretary in a thutchilh a ni. NEICC project lian ber kan hriat lar tak pakhat chu, Subject hrang hranga degree lak theihna, North-Eastern Hill University (NEHU) pawmpui thlap Union Christian College (UCC), kum 1952 a a din hi a ni a. Heta tang hian mi za tam takin hlawhtlinna an pawchhuak tawh a ni.

Kum 1975 a NEICC inkhawmpui Shillonga neih a nih tumin NEICC Day of Prayer neih hi rel a ni a. A tirah chuan November Pathianni vawi 3 na hman thin a ni. Kum 1994 inkhawmpui Aizawla neih a nih tumin, kumtin October Pathianni vawi 3 naah NEICC member Kohhran tin ten hman thin turin a siam tha leh ta a. NEICC hi kohhrante din a ni a, kohhran hote tawngtaina leh thilpek atanga inenkawl leh hna thawk a ni a, Kohhran hovin ngaihthah lova kan chhawmdawl reng a tul a ni.

Tawngtai rual thupui :

- 1) NEICC Hruaitute leh thawktu zawng zawngte tan.
- 2) NEICC hnuaia Kohhran hrang hrang ten in unauna leh thawhhona tha kan neih zel theih nan.
- 3) India hmarchhak ramte-ah Pathian ram din thara a awm zel theih nan.
- 4) NEICC hnuaia Thalai Pawl (Youth Assembly) leh Hmeichhe Pawl (Women Assembly) te rawngbawlina a lo chak zel theih nan.
- 5) NEICC Project lian 2, Union Christian College leh Higher Secondary Schoola thawktute leh zirlai zawng zawngte tan.

(NEICC Head Quarters atanga thupui leh programme kan dawng a nih chuan, Kohhran tinah rawn thawn darhin, chumi ang chuan kalpui tur a ni ang. Dawn a nih loh chuan hei hi hman tur a ni.)

**BWA HMEICHHE TAWNGTAI NI
(BWA WOMEN'S DAY OF PRAYER)
November 1, 2021 (Thawhtanni)**

Khawvel pumpui Baptist Kohhran Hmeichhe Pawl hian Kum tinin November thla a Thawhtanni hmasa ber hi *Tawngtai ni* atan an hmang thin a. Thupui leh Programme hi Khawmualpui hrang hrang ami ten insiam chhawkin Testimony ropui leh ngaihnam tak takte, Sermon leh Bible Study te an buatsaih thin a, a hlawk thlak em em a ni. Hetia khawmualpui hrang leh ram hrang hrang amite lungruah leh thukhat vuaa thupui thuhmun hmanga tawngtai thin hi a hluin, nasa taka Pathian ram tinghetu leh tizautu a ni ngei ang. Tunah hian khawmualpui hrang hrang 7 a, ram hrang 156 ah Baptist World Women hi an in zarpharh tawh a, tawng thu-ah pawh chi hrang 80 lai an hmang a ni.

Baptist Hmeichhe Tawngtai Ni lo intanna bul tak chu Kum 1948, khawvel indopui 2-na tawp hnu lawkah khan a ni a. Chutih laia Women's Committee of the Baptist World Alliance Chairperson nilai Olive Martin-i huaihawtin London khawpuiah ram hrang hrang 9 atanga lokal Baptist hmeichhia 19 te an tawngtai ho a. Indopui rapthlak taka tuartu tam berte hi hmeichhia leh naupangte an ni a. Indopuiin nasa taka a hliam leh harsatna tawktute an nih avangin, chutia rilru inhmuh tlang taka Pathian hmaa an han kun ho chu nuam an tiin thlamuanna nasa tak an lo nei ta a. An tawngtai ho atanga ni thum ni ah chuan European Baptist Women's Union tih chu a lo ding nghal ta mai a. Chu Pawl hma lakna chuan Baptist hmeichhiate tawngtai ni siamin, khawvel pumpuia Baptist hmeichhe pawl leh midangte tana tawngtai sakna November thla chawlhkar hmasaberah an lo nei ta thin a ni.

Tichuan kum 1950 ah Baptist Womens' Day of Prayer chu din a lo ni leh ta a, hmun tina hmeichhe pawl te ngaihhlut a hlauh hle. Hmun tam takah chuan he tawngtai ni hmang tur hian ke a thui tak tak kal ngai leh kawng chhuk chho tak tak zawhte a tul thin a. Asia leh Africa ram thenkhatahte phei chuan luite an daikaiin an hleuh kai ni te pawhin hriat a ni. Mizorama BKHP member zawng zawngte pawh he ni-ah hian khawvel hmun hrang hranga kan unau hmeichhiate tawngtaina lo zawmpui ve turin thahnemngai takin kan in sawm a ni. Hun hman dan tur kimchang chu MBKHP lamin BWA atanga programme a dawn hunah Unit tina la inthawn leh tur a ni.

KHAWVEL SUNDAY SCHOOL NI
November 7, 2021

Thupui : Mi bote Krista hnena hruai
Bible chhiar tur : Thufingte 24 : 11-12 ; Luka 19 :10

Thu chhiar chhuah tur :

Baptist Church of Mizoram, Christian Education Department thil tum 4 zinga point hmasa ber hi kumin Khawvel Sunday School Ni ah hian thupuih hman a ni a. Hei hi kan Kohhran thiltum lian ber pawh a ni.

Mi bote Krista hnena hruai tih hi kan Sunday School thil tum pakhatna a ni a. Beginner pawl atanga Baptisma an zir chhungin tihhlawhtlin ngei ni thei se kan ti a ni. Zirtirtu atan pawh thlaraubo vei mi inruat thin ni se, kan zirlai naupangte chu Baptisma pawl thleng an zir tawh chuan Krista hnena hruai ngei an nih kan beisei tlat a ni.

Vawiin thlenga Kohhran mi tam takte Zu leh Drugs ngawlvei kan tih thinte, sualna dang Corruption leh hmeichhiat mipat thua pawisak neilo taka kan awmna chhante hi, naupang kan nih laia Krista hnena hruai thlen kan nih loh vang ni berin a lang. Thi tura Setanan a hruai bo mekte hi Krista hnena hruai thlen an nih ngei theih nan Kohhran pawhin tawngtaina nen tan kan lak a pawimawh em em a ni.

Khawvel huap pawha mi hlawhtling leh mi lar tak tak, Oswald J.Smith te, Billy Graham te, John Wesley leh midang tam tak te pawh naupan laia piangthar an ni. Sunday School din chhuaktu Robert Raikes leh zirtirtu hmasa Pi King-i te pawhin Factory leh Industry a hlawh tlem te te pe a naupang chhawr thinte chu Pathianni ah sawm khawmin, Krista chanchin tha an zirtir thin a. Naupang tam tak Krista ke bulah an hruai thleng ta reng a. He rawngbawlna hi Mizoram Baptist Kohhran Sunday School pawhin a din tirh atanga vawiin thlengin a la chhunzawm ta zel a ni.

Lal Isuan," Boralte zawnga chhandam turin mihring fapa hi a lokal a ni reng a ni" a tih hi kan Kohhranah a lo hlawhtlin zel theih nan theih tawp i chhuah theuh ang u.

NAUPANGTE NI
November 21, 2021

Thupui_ : Vanram chu hetiang mite ta a ni si a (Matthaia 19:14)

Bible chhiar tur : Matthaia 18:1-5 ; Thufingte 22:6

Naupang ngaihsak nachang hriat hi mifing leh changkangte zia a ni a. Ram leh hnam hnufual apiangin naupang an thlahthlamin an ngaihthah a, ngaih pawimawh nachang an hre lo. Tuna Naupangte hi nakin lawka kan ram leh hnam min kaihruiatu turte an ni tih hria a, zirtirna tha leh hrisel pekte, uluk leh fimkhur taka enkawl leh venhimte an tul takzet a ni. India ram Prime Minister lo ni tawh Pandit Jawaharlal Nehru kha naupang ngaina mi leh a kalna apianga naupangte ngaihnat hlawh tak a ni a. A mize ropui tak chu hrerengin a pian ni, November 14 chu India sorkarin Naupangte Ni (Childens' Day) ah a puang ta hial a. Naupangte intihhlamna ni atan leh, naupang ten Society ah chanvo pawimawh tak an neih dante, ram leh hnam tana mi pawimawh an nihzia sawichhuahna hun atana hman a ni.

BCM Assembly 2015 chuan ABC pakhat atanga thu lo lut, BCM pumpui huapin Pathianni zing inkhawm vawi khat Naupangte Ni-ah hman ni rawh se, tih chu Assembly Executive Committee rel fel turin a dah a. November Pathian ni vawi thumna chu kum tin Naupangte Ni a hman turin a lo chhuak ta a; BCM chuan kum 2016 atang khan a hman tan ta nghal a ni. KNP Day chu KNP ten tha an tih angin anmahni pualin programme te an siam thin a. Naupangte Ni erawh hi chu Kohhran pum huapa naupangte pawimawhna sawi nan leh, mipuite inzirtirna hun atan hman tur a ni a. Kohhran pawhin KNP te kuta dah mai lovin, helama tuimi leh hun hman awm deuhte ngaihtuah thin ni thei se; naupangte chu a tam thei ang chanvo nei tura hun pek erawh ni thin nise a tha hle ang.

RUALBANLOTE NI
November 21, 2021

Thupui_ : Nimahsela Lalpan mi ngaihtuah thin a (Sam 40:17)
 Bible chhiar tur : Sam 42 : 1-11 ; Isaia 49 : 14-17
 Hla sak ho tur : Manganna ka tawhte zinga (KHB No.430)

Mithiamte chuan khawvela mihring za zela panga-te hi taksaah emaw, rilru lamah emaw rual banlohna engemaw tal nei niin an chhut a. Rualbanlohna hi chi hrang hrang a awm thei a, sawi vek sen a ni lovang. Tin, rualbanlo saa piang an awm laiin Mizovin, 'Piansualin tlailuat a neilo' kan tih anga tawhsual tawh palh leh, chhan chi hrang hrang vanga puitlin hnu thlenga rualbanlo nih theihna chance hi tam tak a awm a ni.

Rualbanlo kan tih tam tak hi inenkawl danin a zir loh vanga mihring tling zo lote an ni a. Taksa leh rilru lama rualbanlo tam takte erawh hi chu tha taka enkawl leh zirtira, nasa taka hmasawn thei leh mi pangngaia chhuah leh theihte an ni tih hriat a tul hle. Hetiang mite ngaihsak leh an chungga lainatna lantir hi ringtu ten kan ngaihthah hauh loh tur a ni. Kan Lal Isua rawngbawlina chhonzawmna pawimawh ber pakhat a ni tih hria in, BCM pawhin rualbanlote, piangsual leh mi anglote hi kan khawngaihin kan ngaihsak a ni tih lantir nan an puala Pathianni hman a rel a. Kum 2008 atang khan November Pathianni hnuhnung ber chu Rualbanlote Ni a hman turin a lo dah ta a ni.

BIBLE SUNDAY
December 5, 2021

Thupui : Pathian thu thiltihtheihna (Hebrai 4: 12)

Zing Inkhawm thupui : Pathian thu hlutna (Sam 19 : 7-10)

Thupui then : 1.Nunna siamthatu a ni
2.Thinlung tilawmtu a ni
3.Khawizu aia thlum a ni

Zan Inkhawm thupui : Pathian thu – Mi tin mamawh (Luka 2:10)

Thupui then : 1.Mitin mamawh a in ang vek lo
2.Mitinin Pathian thu kan mamawh vek
3.Thlarau neia siam kan nih avangin kan mamawh

Khawvela Bible Society lo din tanna chu London khawpuia British and Foreign Bible Society (BFBS), March 7,1804 a an din kha a ni. Heta tang hian khawvel ram hrang hrangah Bible Society rawngbawlina chu a lo tai darh ta zel a. India pawh November 1,1944 ah BFBS atanga indang ta a ni. Tunah hian Bible Society 147 lai awm tawhin, heng Society hrang hrangte rawngbawlina hi insu buai lova, tluang taka a kal theih nan leh khaikhawmtu atan May 9, 1946 khan *United Bible Society* din a ni a. Khawvel hi hlawm 4 ah thenin, India hi Asia Pacific Region hnuaiiah kan awm a ni. Bible Society of India in tihpuitlin a tum chu – *Pathian thu hi mi tinrengin an hriat theih tur tawng leh mi naran pawhin an lei ve theih tur tawk man tlawma buatsaih* a ni.

Bible Sunday hi Bible Society pual deuh bik atan Kohhran hrang hrangin kan hmang thin a. Kohhran hruaitute leh BSI hruaitute pawh Kohhran hrang hranga insem darhin Bible Society rawngbawlinate leh Kohhran member ten he rawngbawlina atana kan thawh theih dan turte an sawi thin. Inkhawm thawhlawm chu Tualchhung Kohhranin Area/Branch ah chhunluh tur a ni a, an nin Bible Society rawngbawlina atan Auxiliary ah an chhunglut ve leh dawn a ni.

KRISMAS NI
December 25, 2021 (Inrinni)

Thupui siam a ni lova, Kohhran Committee in tha a tih ang leh kan hlawkpui theih tur ang bera ruahmanna zau tak siam ni se.

Khawvel ram tina Kristiante zingah Isua pianna hriatrengna Krismas ni hi Pathian fakna, chawimawina, zahna leh chibai bukna hun hlimawm leh thlakhlelhawm berah hman vek a ni. Lal Isua pian ni leh kum thu-ah hian chhut dan leh ngaihndan hrang hrang a piang nasa hle a. Chuvangin Krismas ni kan hman hun pawh a in ang lo nual baw. December 25 hi Protestant leh Roman Catholic kohhran tam berin an hmang a. Keini pawh sapram atanga lokal kan Missionaryte min kaihhruai dan ang zelin, an nin an hman thin December 25 hi kan lo hmang chho ve ta zel mai a nih a rinawm. Eng pawh ni se, eng ni berah emaw hi chuan Isua hi a piang ngei si a. He khawvela a hun tawng zawng zawngte kha kan chhandamna tura kawng min siam sakna vek a nih avangin a pian hun, ni leh kum dik tak hrelo pawh ni ila, chumi hriatrengna atana Kohhran ho ten ni serh bik kan lo neih chu a sual chuang hauh lova, Pathian tha tih zawng pawh a ni ngei ang tih a rin theih a ni. Kum zabi 4 na velah khan khawvel hmun hrang hrangah Krismas hi an hmang tawh ni a hriat a ni a. Kum zabi 20 na laihawl velah chuan khawvel pumah Krismas hi kristian ten an hmang vek tawh a ni. December 25, Krismas ni a hman hun hmasa ber chu AD 325 ah niin hriat a ni a; chu chu Rom lal Constantine-a kristian lo ni ta hun lai kha a ni.

Ram hrang hrangah Krismas kan hman dante a in ang vek lem lova; amaherawhchu hlung leh hlimawm zawk a hman dante zir chho zelin, midangte tih dan hrulah thil tha zawkte pawh chher thar zel a ni a. Hmuh theih leh hmuh theih loh lamah Krismas hlutna chuan mite thinsungah hmun a chang lian ta tial tial a ni. Krismas hman dan khingbai tak a awm thei a; chuvangin Krismas hi naupangte tan emaw, nula leh tlangvalte tan emaw, a nih loh leh mi awmthei fate hlimhlawp bawl na ang lek emawa ngaih theih turin Kohhran leh chhungkaw programme te siam lo ila. Vantirkohvin Berampute hnena a rawn sawi ang khan, mitin ta tur chanchin tha lawmawm em em kan zinga lo thleng a ni tih hre rengin, mi zawng zawng, a pui a pang, a lian a te-in hlim leh lawm taka nau piang chibai kan buk vek theihna tur i ngaihtuah theuh ang u.